



СЕН — ҚУДРАТ МАНБАИ, САОДАТ МАСКАНИ, ЖОНАЖОН ЎЗБЕКИСТОНИМ!

Ўзбекистон Республикаси
Президентининг
Ф А Р М О Н И

**ТОРКУНОВ АНАТОЛИЙ
ВАСИЛЬЕВИЧНИ**

**ЎЗБЕКИСТОН РЕСПУБЛИКАСИНИНГ
“ДЎСТЛИК” ОРДЕНИ БИЛАН
МУКОФОТЛАШ ТЎҒРИСИДА**

Ўзбекистон Республикаси ва Россия Федерацияси ўртасидаги стратегик шериклик муносабатларини мустаҳкамлаш, гуманитар соҳадаги кўп йиллик самарали ҳамкорликни ҳамда академик ва илмий-таълим алмашулар бўйича узоқ муддатли дастурларни амалга оширишни қўллаб-қувватлашдаги шахсий ҳиссаси, шунингдек, халқаро

муносабатлар ва иқтисодиёт соҳасида юқори малакали мутахассисларни тайёрлашдаги бевосита иштироки учун Россия Федерацияси Ташқи ишлар вазирлигининг Москва давлат халқаро муносабатлар институти ректори Торкунов Анатолий Васильевич Ўзбекистон Республикасининг “Дўстлик” ордени билан мукофотлансин.

Ўзбекистон Республикаси
Президенти

Ш. МИРЗИЁЕВ

Тошкент шаҳри,
2020 йил 25 август

Қарор ва ижро

ЗАМОНАВИЙ ЭЛЕКТРОН КООПЕРАЦИЯ ПОРТАЛИ

Шу кунга қадар жами 65 288 та маҳсулот савдога қўйилиб, 4,5 триллион сўмлик шартномалар имзоланди. Уларнинг энг паст нархларда шакллантирилиши натижасида буюртмачиларнинг бир триллион сўм маблағи иқтисод қилинди

Президентимиз жорий йил 21 август куни ўтказган йиғилишида локализация ва кооперацияни ривожлантириш масалалари атрофида муҳокама қилинган экан, ҳозирги кунда мамлакатимиз sanoatida маҳаллийлашган маҳсулот ҳажми атиги 4 фоизни ташкил этиши қайд этилди. Масалан, автомобиль sanoatida импорт қилинаётган 1 минг 712

турдаги бутловчи қисмларни юртимизда ишлаб чиқариб, валюта харажатларини камида 150 миллион долларга камайтириш мумкин. Ушбу маҳсулотларни ўзлаштирувчи ҳудудий корхоналарни аниқлаб, уларда юқори қўшилган қиймат яратиш вазифаси қўйилди.

▶ Давоми 2-бетда

Мустақиллигимизнинг 29 йиллигига



ҚОРАҚАЛПОҒИСТОН РЕСПУБЛИКАСИ: ҲАР БИР ИНСОННИНГ ҲАЁТ ДАРАЖАСИНИ ЯНАДА ЯХШИЛАШ — УСТУВОР ВАЗИФА

Кўриб ҳавасим келди

Эрта тонгда телефоним жиринглади. Гўшакини кўтарсам, таниш овоз эшитилди. Дўстим Қувондиқ телефон қилаётган экан. У тўрт-беш йилдан буён Қозоғистонда яшаётган эди. Салом-алиқдан сўнг у кеча Нукусга келганини айтиб, вақтим бўлса, бугун шаҳарни бирга айланишни таклиф қилди. Гап орасида шаҳар жуда ўзгариб кетганидан хабардорлигини, шу боис, бирга айланмоқчи бўлганини таъкидлади. Бир соатдан сўнг вокзал ёнида учрашдик ва шаҳар бўйлаб сайрни бошладик.

— Чап томондаги бино “Нукус полимер” масъулияти чекланган жамияти. Корхона хориждан келтирилган замонавий ускуналар билан жиҳозланган, — дея шаҳарни таништиришни бошладим мен. — Асосий хомашё полиэтилен ва полипропилен гранулалари Устюрт ва Шўртан газ-кимё мажмуаларидан олиб келинади. Корхонада йилга диаметри 16 миллиметрдан 630 миллиметргача бўлган 12 турдаги, юқори босимга чидамли 8 минг тонна маҳсулот ишлаб чиқарилади. Бу эса “Нукусэлектрораппарат” кўшма корхонаси. Бу ерда Италия, Германия, Швейцария, Хитой ва Россиядаги йриқ компанияларнинг

инновацион технологиялари ёрдамида замонавий турдаги юқори ва паст кучланувчи трансформатор, паст вольтли комплекс қурилмалар, аппаратуралар ва электромонтаж буюмлари, халқ истеъмол товарлари билан бирга металл мебеллар, шунингдек, металл конструкцияларнинг кенг тўпламини ишлаб чиқарилади. Хусусан, 6-10 киловатт қувватга эга трансформатор подстанцияларига бўлган талаб халқ хўжалигининг барча тармоқларида юқори. 2020 йилнинг 7 ойи давомида 59 миллиард сўмлик маҳсулот ишлаб чиқарилди. Корхонада 231 нафар ишчи ишлайди.

Ўзбекистон кўчаси бўйлаб кетарканмиз, катта иморатга кўзи тушган дўстимнинг қувончини юзидан англадим. Бу бинода “NUKUS MED TEX” масъулияти чекланган жамияти жойлашган. Корхона йилига 146 миллион дона бир марталик тиббий шприц ва инфузион система ишлаб чиқаради. Бугун бу ерда 230 киши доимий иш билан банд. Аллаёр Досназаров кўчаси Нукус темир йул вокзалидан бошланади. Кўча бўйлаб сайр қилар эканмиз, дўстимни атрофда қад ростлаган иншоотлар билан таништиришда давом этдим.

▶ Давоми 3-бетда

Ўзбекистон Республикаси Президентининг “Лицензиялаш ва рухсат бериш тартиб-таомилларини тубдан такомиллаштириш чора-тадбирлари тўғрисида”ги Фармони қабул қилинди

Фармонга мувофиқ, 2021 йил 1 январдан бошлаб:

- ✔ 37 та лицензия ва 10 та рухсатнома бекор қилинади;
- ✔ 16 та лицензия ва 11 та рухсатнома бирлаштириш йўли билан бекор қилинади;
- ✔ 17 та лицензия ва 14 та рухсатнома хабардор қилиш тартиби жорий этилиши йўли билан бекор қилинади;
- ✔ 14 турдаги лицензия ва рухсатномаларни расмийлаштириш муддатлари қарийб 2 бараварга қисқартирилади;
- ✔ 115 та лицензия ва рухсат бериш хусусиятига эга ҳужжатларни олиш тартиб-таомиллари янада соддалаштирилади.

Фармонга кўра, хабардор қилиш тартиби жорий этилган фаолият (ҳаракат) учун расмийлаштирилган лицензия ёки рухсат этиш хусусиятига эга ҳужжатларнинг амал қилиши ўз кучида қолади ва ушбу фаолият(ҳаракат)ни амалга ошириш учун ваколатли органни хабардор қилиш талаб этилмайди.

- ✔ туризм фаолиятини лицензиялашда туроператорлар хизматларини сертификатлаш ихтиёрий этиб белгиланади.

Куйидагилар бекор қилинади:

- ✘ кредит бюрolari фаолиятини лицензиялашда камида 10 та тижорат банки билан кредит алмашинувини амалга оширишга розилигини тасдиқловчи ҳужжат мавжудлиги талаби;
- ✘ дори воситалари ва тиббий буюмларни чакана реализация қилиш фаолиятини лицензиялашда ушбу фаолият учун лицензияга эга бўлган юридик шахслар томонидан уларнинг худди шундай фаолият билан шуғулланувчи филиаллари ташкил этилганда ҳар бир филиал манзилини асосий лицензияда кўрсатиш амалиётини жорий қилиш орқали филиалларга алоҳида лицензия расмийлаштириш амалиёти;
- ✘ ер қатъи участкаларидан фойдаланиш ҳуқуқи учун лицензия олишда талабгордан маҳаллий давлат ҳокимияти органларининг кафолат хатларини олишни талаб қилиш тартиби.

